

[www.BibleForChildren.org](http://www.BibleForChildren.org)

# Génesis 3



Tsëpitanam Adánqa warminpa shutin  
churarqan Evata. Tsë shutita churarqan  
pëllapita llapan nunakunapis  
mirayänanpaq kaptinmi.



Teyta Dios Ilapan kamanqan  
animalkunapitapis culebraqa mas  
sabidum karqan. Tsëmi warmi  
këkanqanman ëwëkur nirqan:  
<<¿Rasunpaku Dios niyëshurqunki  
montikunapa wayïninta mana  
mikuyänëkipaq?>>



Tsënö tapuptinnam  
warmi nirqan: <<Llapan  
montipa wayininta  
mikuyänäpaqmi  
niyämashqa. Tsënö kaptinpi huerta  
chöpinchö këkaq montipa wayinintaqa  
mana mikuyänäpaq ni mana  
yatayänäpaqmi niyämashqa.  
Tsë montipa wayininta  
mikurqa wanuyäshaqshi>>.



Tsënam culebra  
nirqan: <<Manam  
wanuyankitsu. Tsë  
montipa wayininta  
mikuyanqëki junaqqa Diosnömi  
musyariyanki ima alli kanqanta y ima mana  
alli kanqantapis. Tsëmi Diosqa munantsu  
mikuyänëkita>>.



Tsënö niptinmi warmi tsë montipa wayininta alläpa shumaqta rikëkur munapärirqan. Tsëmi yachaq y musyaq këta munar montipa wayininta pallarir mikurirqan. Tsëpitanam qowanta makyariptin pëpis mikurirqan.



Mikurirnam tsë höra mäkuriyarqan  
qalapächulla kékäyanqanta. Tsë  
höram higus montipa rapranta jirarkur  
penqëninkunata tsapakuyarqan.





Tsämi Teyta

Dios qayarnin kënö nirqan:


<<Adán, ¿mëchötaq këkanki?>>

Tsënö qayëkuptinmi Adánqa yaskirqan:

<<Huertachö purikanqëkita wiyëkurmi qalapächulla karnin penqakur ratakurqü, Teyta>>.







Tsënam Teyta

Dios tapurqan: <<¿Pitaq

nishurqunki qalapächulla këkanqëkita?

Itsa mikurqunki <ama mikunkitsu> ninqä

montipa wayininta>>.





Niptinnam Adán nirqan: <<Yanaqıpaq qomanqëki  
warmi makyamaptinmi tsë montipa wayininta  
mikukurkullarqü, Teyta>>. Tsënam Teyta  
Dios tapurqan warmita: <<¿Imatataq  
rurarqunki?>> Tsënam warmi nirqan:  
<<Culebra ulipämaptinmi tsë montipa  
wayininta mikukurkullarqü>>.





Tsämi Edén huertapita Teyta  
Dios nunata qarqurirqan allpapita  
kamashqa kar chakrachö uryar  
kawanapaq.





Nunata tsënö


qarqurirmi inti yarqamunan läduman  
querubinkunata Teyta Dios churarqan  
nina rawrëkaq espädawan huertata  
täpayänanpaq. Tsëmi  
querubinkunaqa täpëkäyarqan  
imëyaqpis  
kawatsikuq  
montiman pipis mana yëkunanpaq.




Tsëpitanam Adánqa warmin Evawan punuriyarqan.  
Evanam qeshyaqyärirqan y ollqu wawan yurikuptinnam  
nirqan: <<Teyta Dios munaptinmi kë ollqu wawä  
yurishqa>>.




Tsämi wawanpa shutin churarqan Caínta.  
Tsëpitanam yapë qeshyaqyärir qeshpikurirqan ollqu  
wamrata. Tsë wawanpa shutinnam churarqan Abelta.  
Winarkurnam Abelqa üshata y chiwata  
wätakuq karqan. Caínnam chakrachö  
uryaq karqan.



Tsëpita watakuna pasariptinnam Caínqa chakrapa wayininta ofrendata Teyta Diospaq aparqan.  
Tsënömi jina Abelpis Teyta Diospaq aparqan üshankunapa y chiwakunapa punta yuriq wawankunata.




Apashqanta pishtarirmi wirankunata Diospaq kayarqan.  
Tsëtam Teyta Dios kushishqa chaskirqan.  
Caín apanqan ofrendataqa manam  
chaskirqantsu. Tsënö mana  
chaskiptinmi Caínqa alläpa  
piñakur pukayëkacharqan.





Tsëpita juk junaqnam Caínqa wawqin Abelta nirqan:  
<<Jirkapa aku ëwashun>>. Jirkachö ishkan këkarnam  
Abelta wanuratsirqan.



Tsëpitanam Caínta Teyta Dios tapurqan: <<¿Mëtaq wawqiki Abelqa?>> Tsënö tapuptinnam yaskirqan: <<Manam musyätsu. ¿Acäsu wawqĩ täpaqku kä?>> Tsëpitanam Teyta Diospa nöpanpita Nod lädupa Caín ewkurqan tsëchö täränanpaq. Tsëqa karqan Edén huertaman inti yarqamunan läduchömi.



Adánpa warmin yapë qeshyaqyärirnam qeshpikurirqan  
ollqu wamrata. Yurikuriptinnam nirqan: <<Wawä Abelta  
Caín wanutsishqa kaptinmi Teyta  
Dios munashqa pëpa rantin juk wawä  
kananta. Tsëmi pëpa shutin kanqa Set>>.



Tsurin Set yuringanpita puwaq pachak (800) wata masran Adán kawarqan. Pëpaqa tsurinkuna ollqupis y warmipis kayarqanran. Isqun pachak kima chunka (930) watayuq këkarmi Adán wanukurqan.




Teyta Diosmi rikarqan nunakuna pasëpa jutsa rurëllachö kawakuyanqanta. Pëkunaqa shonqun munashqannö jutsata rurananllapaqmi yarpäyaq. Tsënö kaptinmi nunata kamanqanpita Teyta Dios pasëpa llakikurnin kënö nirqan:



<<¿Imapaqraq kë patsachö nunata rurëkurqä?  
Kananqa llapan nunakunatam  
ushakätsishaq. Tsënöllum llapan  
animalkunatapis, lätëpa puriqkunata  
y päriqkunatapis ushakätsishaq>>.



Noétaqa Teyta Dios ankuparqam.  
Noépa tsurinkunam kayarqan  
Sem, Cam y Jafet.



Nunakunata alläpa kuyarmi japallan  
Tsurinta Teyta Dios kachamurqan.  
Tsëmi pipis pëman markäkuq kaqqa  
condenashqatsu kanqa, sinöqa  
wiñë kawëtam taringa.





Romanos 3:23 Llapan nunakunam jutsayuq kar Teyta Diospa nöpanman chëta puëdiyantsu.

Romanos 6:23 Jutsa rurëqa wanïmanmi apamantsik. Señornintsik Jesucristo noqantsik rëkur wanushqa kaptinmi Teyta Dios alli këninwan salvamantsik nöpanchö wiñëpa kawanantsikpaq.

Hebreos 9:27 Tsënöllum llapan nunakunapis juk kutilla wanuyan y tsëpitaqa juzgashqanam kayanqa.

Efesios 2:8,9 Teyta Dios ankupäkuq karmi Jesucristuman markäkushqa salvacionta qaramashqantsik. Manam kikintsikpitatsu ni allita rurashqantsikpitatsu salvacionta tarirquntsik, sinöqa Teyta Diospitam. Tsëmi pipis alabakunqatsu: <<Allikunata rurashqäpitam Teyta Dios salvamashqa>> nir.



Romanos 10:9,10 Señornintsik Jesucristo mandashuqniki kashqanta nirqa y wanushqanpita Teyta Dios kawaritsishqanta llapan shonqikikunawan creyirqa salvashqam kayanki. Llapan shonqikiwan creyiyaptikiqa Teyta Dios perdonayäshunkim. <<Señor Jesucristuqa mandamaqnimi këkan>> niyaptikiqa Teyta Dios salvayäshunkim.

Juan 3:16,17 Nunakunata alläpa kuyarmi japallan Tsurinta Teyta Dios kachamurqan. Tsëmi pipis pëman markäkuq kaqqa condenashqatsu kanqa, sinöqa wiñë kawëtam taringa. Manam nunakunata infiernuman jitananpaqtsu Teyta Dios Tsurinta kachamurqan, sinöqa pëman markäkuyaptin salvananpaqmi.



1 Juan 5:11-13 Wiñë kawëta qomashqantsiktam Teyta Dios käyitsimarquntsik. Tsë kawëtaqa tarintsik Tsurin Jesucristuta chaskikurmi. Teyta Diospa Tsurinta chaskikuq kaqqa wiñë kawëtam tarin. Mana chaskikuq kaqqa tsë kawëta manam tarinqatsu. Teyta Diospa Tsurinman markäkuyaptikim kë cartata apatsimü wiñë kawëta tariyashqëkita musyayänëkipaq.



# Génesis 3 – 6

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: M. Maillot; Tammy S.

Quechua, Huaylas Ancash Bible (qwh) © 2018, Wycliffe  
Bible Translators, Inc. All rights reserved.

<https://www.bible.com/bible/734/GEN.1.QWHB>

©2025 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

